

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ԴՎԻՆԻ ՊԱԼԱՏԻ ԿԱՌՈՒՅՄԱՆ ԺԱՄԱՆԱԿԻ ՄԱՍԻՆ

Ս. Խ. ՄԱՅԱԿԱՆՅԱՆ

Դվինի պալատը իրավամբ համարվում է վաղ միջնադարյան հայկական ճարտարապետության ամենանշանավոր հուշարձաններից մեկը: Այն հայտնի դարձավ 1937—1939 թթ. պեղումների ժամանակ, երբ վերջնականապես լույս աշխարհ հանվեց ղղալի շափեր ունեցող ($31,18 \times 31,93$ մ) այս կառուցվածքը: Դժբախտաբար մեզ են հասել պատերի առաջին շարքերը միայն, իսկ առանձին հատվածներում մնացել են սոսկ հիմնապատերը: Ըստ իր հատակագծային հորինվածքի այն քառակուսի եզրածե ունեցող եռանավ կառուցվածք է, որտեղ կենտրոնական սյունազարդ դահլիճը ($11,56 \times 26,90$ մ) երկու կողմից երիզվում է համեմատաբար փոքր շափեր ունեցող սենյակներով: Իրենց նախնական տեղում են հինգ բավական մեծ խարիսխները: Համարյա թե ամբողջությամբ մեզ են հասել մի հիանալի ոլորազարդ խոյակ և նման խոյակների մի քանի բեկորներ: Ուշագրավ է, որ ճիշտ նույնատիպ հորինվածք է ունեցել Արուճի պալատը, թեև բացարձակ չափերի տեսակետից այն համեմատաբար ավելի փոքր կառուցվածք է: Նման լուծում է ունեցել նաև Զվարթնոցի պալատը, որտեղ ևս հանդիպում են համանման խարիսխներ և խոյակների բեկորներ: Սակայն եթե վերջին երկու հուշարձաններն էլ ունեն ճիշտ թվադրում (Զվարթնոցի պալատը կառուցվել է VII դարի 40—50-ական թթ., Արուճի պալատը նույն VII դարի 60—70-ական թթ.), ապա նույնը շենք կարող ասել Դվինի պալատի մասին: Զի պահպանվել նրա կառուցման մասին ոչ մի կոնկրետ հիշատակություն և մեզ չի հասել նրա կառուցման ժամանակը ճշտող որևէ վիճազիր արձանագրություն: Այս պայմաններում հասկանալի են այն տարածայնությունները, որ կան հետազոտողների մոտ: Այսպես, Կ. Ղաֆադարյանի կարծիքով պալատը ամենայն հավանականությամբ կառուցվել է 461 թ. անմիջապես հետո կամ 485—489 թթ. միջև¹, Վ. Հարությունյանի կարծիքով այն կարող է կառուցված լինել ինչպես V, այնպես էլ VI դարում, 471—572 թթ. միջև²: Ն. Տոկարսկու կարծիքով պալատը կառուցել է Սմբատ Բագրատունին, երբ VII դարի սկզբում ձեռնարկեց Դվինի մեծ տաճարի վերակառուցման գործը³:

Յուրաքանչյուր ճարտարապետական հորինվածքի թվագրության որոշման համար առաջնակարգ նշանակություն ունի երկու հիմնական գործոն՝ առաջինը մատենագրական վկայություններն են, իսկ երկրորդը՝ բուն հո-

¹ Կ. Ղաֆադարյան, Դվին քաղաքը և նրա պեղումները, Երևան, 1952, էջ 119:

² Վ. Հարությունյան, Դվինի V—VII դարերի ճարտարապետական հուշարձանները, Երևան, 1950, էջ 57:

³ Н. М. Токарский, Архитектура Армении IV—XIV вв., Ереван, 1961, էջ 66:

շարձանի ճարտարապետական ձևերը, ընդ որում երկու գործոնների համընկնումն է, որ ի վերջո պայմանավորում է թվագրության ճշտությունը: Հարցն ավելի է բարդանում, եթե չեն պահպանվել բոլոր տվյալները, երբ չկան ո՛չ վիճադրական արձանագրություններ և ո՛չ էլ պատմիչների, հատկապես կառուցմանը ժամանակակից պատմիչների ուղղակի հիշատակություններ: Իսկ եթե բուն կառուցվածքից էլ առանձին հատվածներ են մնացել միայն, չպետք է զարմանալ, որ հետազոտողների մոտ հանդիպում ենք հաճախ տրամադրածորեն հակառակ, իրարամերժ կարծիքներին:

Այժմ նման իրադրություն է ստեղծվել Դվինի ամենանշանավոր կառուցվածքներից մեկի՝ կաթողիկոսական պալատի թվագրության հարցում, երբ հուշարձանը թվագրվում է V, VI և VII դարերով, մի բան, որը չի կարող համակերպվել հայկական ճարտարապետության ուսումնասիրության այժմյան մակարդակի հետ: Այս նախադրյալներից ելնելով էլ անհրաժեշտ է դառնում հանգամանորեն քննել թե՛ հուշարձանի մասին մեզ հասած պատմական տեղեկությունները, թե՛ ճարտարապետական այն բոլոր տվյալները, որոնք ընձեռում է ինքը՝ հուշարձանը:

Սկսենք մատենագրական տեղեկություններից:

Մեզ հետաքրքրող հուշարձանի մասին եղած տվյալները, դժբախտաբար, խիստ սուղ են, կցկտուր և հաճախ ուսումնասիրողները ստիպված են դիմելու կողմնակի տեղեկությունների այս կամ այն հարցը ճշտելու համար:

Հնագույն տեղեկությունը, որը որոշակիորեն առնչվում է Դվինի կաթողիկոսական պալատի հետ, դա 461 թ. Գյուտ կաթողիկոսի Վաղարշապատից Դվին տեղափոխվելն է, հանգամանք, որը հնարավորություն է տալիս ենթադրել կաթողիկոսական պալատի գոյությունը Դվինում արդեն V դարի երկրորդ կեսում: Սակայն թե որտեղ է եղել այդ շենքը, ինչ ձևեր է ունեցել, այս մասին չունենք և ոչ մի հիշատակություն: Մի բան կարելի է որոշակի ասել, որ այն չէր կարող շատ հեռու լինել Դվինի կաթողիկոսանիստ Ս. Գրիգոր տաճարից: Ղազար Փարպեցին, նկարագրելով Վահան Մամիկոնյանի մարդպան նշանակվելու կապակցությամբ կազմակերպված տոնախմբությունները, գրում է, որ այնքան շատ ժողովուրդ էր հավաքվել, որ տաճարում և արտաքին սլուինսարհներում տեղ չլինելու պատճառով նրանք լցրել էին տաճարի շուրջը եղած հրապարակները. «Եւ ոչ բաւեալ ընդունել զամենեւեան տանն Աստուծոյ՝ լնուին արտաքոյ սրահք եկեղեցւոյն և փողոցք և ամենայն տեղիք հրապարակացն շուրջանակի»⁴: Հաջորդ վկայությունը առնչվում է արդեն 572 թ. ապստամբության հետ, երբ թշնամին այրում է Ս. Գրիգոր տաճարը⁵: Այսպես այրված և կործանված նա մնաց շուրջ չորս տասնամյակ, մինչև VII դարի սկզբին Սմբատ Բագրատունին ձեռնարկեց նրա վերաշինման գործը և հնավանդ բազիլիկայի հիմքերի վրա բարձրացրեց ըստ էության մի նոր տաճար: Այս ամբողջ շրջանից կաթողիկոսական պալատի մասին չկա և ոչ մի հիշատակություն: Հայ պատմիչներն առհասարակ զուսույ են հուշարձանների մասին հիշատակելիս, և անհամեմատ ավելի զուսույ են նրանք, երբ հարցը վերաբերում է աշխարհիկ կառուցվածքներին: Այս տեսա-

⁴ «Ղաղարայ Փարպեցւոյ Պատմութիւն հայոց և թուրթ առ Վահան Մամիկոնեան», Տփղիս, 1904, էջ 178:

⁵ «Սերէոսի եպիսկոպոսի պատմութիւն», Երևան, 1939, էջ 27:

կետից բացառություն չի կազմում նաև Սեբեոսը, որը թեև չի նշում, թե երբ է կառուցվել կաթողիկոսի պալատը, սակայն հիշատակում է, որ հենց այդ պալատում է 652 թ. իջևանել բյուզանդական Կոստանդ կայսրը⁶։

Տաճարը հիմնահատակ կործանվեց 893 թ. մեծ երկրաշարժի ժամանակ։ Պալատը պահպանեց իր գոյությունը ևս մի քանի դար, և հետագայում, ինչպես ցույց են տալիս պեղումները, այն վերածվեց մզկիթի։ Քանդվել է հավանաբար XIII դարում։

Նման իրադրության պայմաններում պատահական չէ բնավ, որ հետազոտողները նպատակ ունենալով գեթ մոտավոր չափով պարզաբանելու վաղ միջնադարյան այս նշանավոր հուշարձանի կառուցման հանգամանքները, որոնում են կողմնակի տվյալներ, թեկուզ և ավելի ուշ շրջանի պատմիչների մոտ։ Այսպես, Վ. Հարությունյանը, անդրադառնալով X դարի պատմիչ Ուխտանեսին, գրում է հետևյալը. «Ուխտանես եպիսկոպոսը պատմում է, որ 572 թ. սբ. Գրիգորի տաճարը խորտակվելու և հրդեհվելու ժամանակ եկեղեցական անոթների մի մասը փոխադրվել է պատրիարքական ապարանք, և որ նոր շենք կառուցելուց հետո այդ անոթները նորից բերվել են տաճարի շենքը։ Այս վկայությունն անվիճելիորեն ցույց է տալիս, որ պատրիարքական ապարանքը կառուցված է եղել համենայն դեպս 572 թ. առաջ» և հետո. «Ենթե հազիվ թե սխալված լինենք, եթե պատրիարքական ապարանքի կառուցման թվականը հասցենք V դարի վերջերը, կամ VI դար, այսինքն 470—471 թթ. և 572 թ. միջև ընկած ժամանակաշրջանը»⁷։

Մեր կարծիքով Ուխտանեսի տեքստի⁸ նման մեկնաբանության հետ դրժվար է համաձայնել։ Ամենից առաջ նշենք, որ Ուխտանեսը բավական մասնորամասն նկարագրելով, թե ինչպես կաթողիկոսի տեղապահ Վրթանես Քերթովը համաձայն ցուցակի նորընտիր կաթողիկոս Աբրահամին է հանձնում եկեղեցական իրերը, ոչ մի խոսք չի ասում այն մասին, թե որտեղ են պահված եղել այդ իրերը և ինչ առնչություն ունեն դրանք շուրջ շորս տասնամյակ առաջ՝ 572 թ. այրված տաճարի հետ։ Անշուշտ կարելի է ենթադրել, որ այդ եկեղեցական իրերը մինչև նորընտիր կաթողիկոսին հանձնելը պահված են եղել կաթողիկոսարանի թաքստոցներում ինչ-որ տեղ (ինչպես այդ ենթադրում է Մ. Օրմանյանը)⁹։ Սակայն ոչ մի հիմք չկա այդ ամսնը կապել Ուխտանեսի տեքստի հետ և եզրակացնել, որ մեզ հետաքրքրող պալատն արդեն գոյություն ուներ 572 թ. և այնտեղ էլ, տաճարի կործանումից հետո, իբր, տեղափոխել են եկեղեցական իրերը։

Կաթողիկոսական պալատի թվագրության հարցին հանգամանորեն անդրադարձել է Կ. Ղաֆադարյանը։

Նա գրում է. «Կաթողիկոսի պալատը Դավիթում շինվել է 461 թվականից անմիջապես հետո, երբ այնտեղ փոխադրվեց հայրապետական աթոռը։ Սակայն, եթե ենթադրելու լինենք, որ հայրապետական աթոռը Դավիթ փոխադրվելուց անմիջապես հետո չի շինվել կաթողիկոսարանը, այլ ավելի ուշ, այդ դեպքում պետք է ընդունենք, որ նա կառուցվել է 461 թվականից հետո և

6 Նույն տեղում, էջ 144։

7 Վ. Հարությունյան, նշվ. աշխ., էջ 57։

8 Ուխտանես եպիսկոպոս, Պատմություն հայոց, հատ. Ա, Բ, Վաղարշապատ, 1871, էջ 66—67։

9 Մ. Օրմանյան, Ազգապատում, հատ. Ա, Բեյրութ, 1963, էջ 619—620։

553 թվականից առաջ, երբ արդեն պալատն իբրև օրինակ շինություն հիշատակված է Յիզտբուզիտի վկայարանը կառուցելու կապակցությամբ» և հետո. «Եթե ընդունենք, որ կաթողիկոսի պալատը 460-ական թվականներին չի կառուցվել, այդ դեպքում պետք է ենթադրենք, որ նրա հիմքը դրել են և կառուցումն ավարտվել է Յովհան Մանդակունու կաթողիկոսության (478—490) վերջին տարիներին, երբ արդեն Վահան Մամիկոնյանը մարզպան էր»¹⁰:

Դժվար չէ տեսնել, որ այս ամենը չի անցնում ենթադրությունների շրջանակներից, և միակ իրական կովանը Գյուտ կաթողիկոսի Դվին տեղափոխվելն է, որը և կարող է համարվել Դվինում կաթողիկոսական պալատի կառուցման ամենավաղ սահմանը:

Կ. Ղաֆաղարյանը նշում է պալատի գոյությունը ևս մեկ, միջանկյալ եզրագիծ՝ 553 թ., երբ, նրա կարծիքով, մեզ հետաքրքրող շենքը արդեն գոյություն ուներ:

Արդ, տեսնենք այժմ ինչ մատենագրական կովանների վրա է հենվում հեղինակը, որոնք նրա կարծիքով հաստատում են պալատի գոյությունը առնվազն VI դարի կեսին: Կ. Ղաֆաղարյանի համար այդպիսի ելակետ է հանդիսանում X դարի պատմիչ Դրասխանակերտցու հիշատակությունը Յիզտբուզիտ նահատակի մասին: Դրասխանակերտցին գրում է, որ Յիզտբուզիտ պարսիկը քրիստոնեություն ընդունելուց հետո «...բազում չարչարանս կրեալ ի մարզպանէ Վշնասն Վահրամայ ի Դվին քաղաքի պսակի մարտիրոսական մահուամբ ի Քրիստոսէ: Զոր բարձրեալ գտուրբ մարմինն սրբոյ մարտիրոսին՝ մեծի հայրապետին ներսեսի բովանդակ եպիսկոպոսօք և կղերիւք եկեղեցւոյ՝ եղին մերձ ի սուրբ եկեղեցին կաթողիկոսարանի յարեւելից կողմանէ, շինեալ ի վերայ վկայարան սուրբ կոփածոյ քարամբք»¹¹: «Բազում չարչարանքներ կրելով մարզպան Վշնասն Վահրամայից, նա մահացավ մարտիրոսական մահով, հանուն Քրիստոսի: Մեծ հայրապետ ներսեսն ու եկեղեցու բովանդակ եպիսկոպոսներն ու կղերը վերցրին սուրբ մարմինը սուրբ մարտիրոսի և դրեցին կաթողիկոսական սուրբ եկեղեցու արեւելյան կողմում և վրան կոփածո քարերից սուրբ վկայարան կառուցեցին»:

Այստեղ պարզ ու հստակ կերպով ասված է, որ Յիզտբուզիտի նահատակումից հետո նրա մարմինը մեծ հանդիսավորությամբ դնում են «մերձ ի սուրբ եկեղեցին կաթողիկոսարանի» — այսինքն կաթողիկոսական սուրբ եկեղեցու մոտ, «յարեւելից կողմանէ», այսինքն նրա արեւելյան կողմում և վրան կոփածո քարերից վկայարան կառուցում¹²:

Կ. Ղաֆաղարյանը պատմիչի այս հատվածից հանդում է միանգամայն այլ եզրակացության: Նրա կարծիքով այստեղ խոսքը կաթողիկոսական պալատի մասին է, և նրա արեւելյան կողմում էլ կառուցվել է Յիզտբուզիտի վկայարանը. վերջինս նա նույնացնում է այստեղ բացված միանավ եկեղեցու հետ: Եվ որովհետև նահատակությունը կատարվել է 553—554 թթ.,

¹⁰ Կ. Ղաֆաղարյան, նշվ. աշխ., էջ 119:

¹¹ «Յովհաննու կաթողիկոսի Դրասխանակերտցու Պատմութիւն հայոց», Թիֆլիս, 1912, էջ 64:

¹² Կ. Ղաֆաղարյանի աշխատության մեջ (էջ 106) Դրասխանակերտցու «Ողին մերձ ի սուրբ եկեղեցին կաթողիկոսարանի» նախադասության «ի» շաղկապը սխալմամբ «ու» է տրվել, մի բան, որը որոշ չափով փոխում է իմաստը:

Կ. Ղաֆաղարյանը եղրակացնում է, որ պալատը արդեն գոյություն ունեւածն Վաղն VI դարի կեսերին¹³:

Որ Դրասխանակերտցին այստեղ խոսում է կաթողիկոսական տաճարի և ոչ թե կաթողիկոսի պալատի մասին պարզ է դառնում նաև ոչ միայն պատմիչի վերոհիշյալ վկայությունից, այլև մի շարք այլ հիշատակություններից, որտեղ նույն այդ աշխարհիկ շենքը բնութագրելու համար որպես կանոն նա օգտագործում է «տուն կաթողիկոսարանի» կամ «տուն բնակութեան» արտահայտությունները:

Այսպես, խոսելով բյուզանդական Կոստանդ կայսեր Դվին գալու և պալատում իջևանելու մասին, նա գրում է, որ Կոստանդը «ի քաղաքն Դվին իջանալս ի տան կաթողիկոսարանին արարեալ»¹⁴ (այստեղ և հետագայում ընդգծումները մերն են — Ս. Մ.):

Անդրադառնալով իշխան Գրիգոր Մամիկոնյանի գործունեությանը, Դրասխանակերտցին հիշատակում է, որ նա եկեղեցի է կառուցում Արուճում և նրա մոտ «հաստահեղոյս քարամբք և կրով պարսպեալ՝ կարգե տուն բրնակութեան իւրոյ»¹⁵:

Խոսելով Դավիթ Արամոնցի կաթողիկոսի մասին, հիշատակում է, որ Արամոնք գլուղը հնուց կաթողիկոսական սեփականություն էր, և այստեղ էլ Դավիթ կաթողիկոսը իր իսկ կառուցած եկեղեցու մոտ հիմնադրում է մի նոր «տուն բնակութեան»¹⁶: Նկարագրելով Եսայի կաթողիկոսի մանկությունը, նա գրում է, որ ապագա կաթողիկոսի աղքատ մայրը, մուրալով «եկն յարեցաւ նա ի տուն կաթողիկոսարանին»¹⁷: Հիշատակելով հուղիմա ոստիկանի այցը Դվին գրում է, որ նա «...տեսեալ զգեղեցկութիւն մեծամեծ դաստակերտիցն տան կաթողիկոսարանին»¹⁸:

Ուշագրավ է, որ կաթողիկոսի նստավայրը, պալատը նշելու համար նույն արտահայտություններն են օգտագործում ինչպես ավելի վաղ շրջանի, այնպես էլ ուշ դարերի պատմիչները:

Այսպես, Սեբեոսը, խոսելով Կոստանդ կայսեր Դվին գալու մասին, գրում է, որ նա «երթեալ ի Դուին՝ նստաւ ի տան կաթողիկոսին»¹⁹: Անդրադառնալով մեկ անգամ ևս նույն հարցին, Սեբեոսը դարձյալ գրում է, որ «Եկն արքայ Կոստանդին և նստաւ ի տան կաթողիկոսին»²⁰:

Ստեփանոս Օրբելյանը խոսելով VIII դարի գործիչ Ստեփանոս Սյունեցու մասին գրում է հետևյալը. «էր սա որդի աւագ երիցու մեծ մայրաքա-

¹³ Նշենք այստեղ, որ Դրասխանակերտցու վերը բերված հատվածը մեզանից շատ առաջ ճիշտ են մեկնարանել մի շարք հետազոտողներ: Այսպես, Լ. Շահնազարյանը գրում է, որ Յիզուրուզիտի «մարմինը հողին հանձնեցին Դվինի կաթողիկոսական տաճարի մոտ, նրա արևելյան կողմում, և վրան վկայարան կառուցեցին» (Ա. Մախնազարյան, Դվին, Երևան, 1940, էջ 39):

¹⁴ Դրասխանակերտցի, էջ 36:

¹⁵ Նույն տեղում, էջ 91:

¹⁶ Նույն տեղում, էջ 105:

¹⁷ Նույն տեղում, էջ 107:

¹⁸ Նույն տեղում, էջ 111:

¹⁹ Սեբեոս, էջ 143:

²⁰ Նույն տեղում, էջ 144:

զաքին Հայոց Դվնոյ և սնանէր ու զարդանայր ուսմամբ ի տան կաթողիկոսարանին Հայոց»²¹։

Կարծում ենք բավական է։ Պարզ է դառնում, որ կաթողիկոսանիստ պալատի բնութագրման համար ամենաառաջնակարգ նախապայմանն է տուն բառի առկայությունը, մինչդեռ Դրասխանակերտցու վերը բերված հիշատակության մեջ ոչ միայն չկա այդ «տուն» բառը, այլև որոշակի կերպով շեշտված է «սուրբ եկեղեցին կաթողիկոսարանի» արտահայտությունը, մի բան, որը կասկած չի թողնում, որ խոսքը այստեղ ոչ թե կաթողիկոսի պալատի մասին է, այլ կաթողիկոսական տաճարի։ Ուշագրավ է, որ նույն այդ «եկեղեցին կաթողիկոսարանի» արտահայտությունը հանդիպում է նրա մոտ մեկ այլ տեղ ևս, որտեղ խոսքը անվերապահորեն վերաբերում է հենց նույն Դվնի տաճարին։ Այսպես, խոսելով 893 թ. Դվնի մեծ երկրաշարժի մասին, նա գրում է. «Վասն զի տաճարակ ի վայր փլուզեալ զպատուար պարսպացն և զապարանս զխաւորացն... և զաստուածաշէն եկեղեցիս կաթողիկոսարանին և զայլ ևս հաստահեղոյս վկայարանս՝ զղրղեալ քանդեալ աւերեալ ի վայր հոսէր»²²։

Որ այդ ահեղ երկրաշարժի ժամանակ իսկապես քանդվել է հենց մեծ եկեղեցին, և ոչ կաթողիկոսական պալատը, լիովին հաստատեցին պեղումները։ Պալատը կանգուն է մնացել ևս մի քանի դար և հետագայում, ինչպես կարելի է ենթադրել, վերածվել է մզկիթի²³։

Այսպիսով, ակնհայտ է դառնում, որ Դրասխանակերտցին այստեղ խոսում է ոչ թե պալատի, այլ կաթողիկոսական եկեղեցու մասին, որից արևելք էլ, ինչպես նշում է նա, կառուցեցին Յիզտրուզիտի դամբարանը։ Իսկ սա նշանակում է, որ մենք ոչ մի հիմք չունենք այդ դամբարանի հետ նույնացնելու կաթողիկոսական պալատից արևելք տեղավորված միանավ եկեղեցին, մի կառուցվածք, որն իր բոլոր ձևերով սերտորեն առնչվում է V դարի համանման կառույցների հետ և նրա թվագրությունը պարզապես չի կարելի ետ բերել և հասցնել մինչև VI դարի կեսերը։

Ինչ վերաբերում է կաթողիկոսական տաճարից արևելք կառուցված Յիզտրուզիտի դամբարանին, ապա այդ մասին անհրաժեշտ է ասել հետևյալը. այն հանդամանքը, որ բազիլիկայի արևելյան, դուրս եկող բազմանիստ արքայից մինչև պարսպի մեջ բացված լայն մուտքը հազիվ բսան մետր տարածություն էր մնում, ինքնին հասկանալի է դարձնում, որ այստեղ չէր կարող թիչ թե շատ նշանակալից չափեր ունեցող կառուցվածք լինել։ Դժբախտաբար տաճարից արևելք ընկած տարածությունը դեռևս լիովին պեղված չէ և թերևս մի օր այստեղ բացվի նման մի դամբարան։ Սակայն մյուս կողմից չպետք է մոռանալ, որ մահմեդական գերիշխանության պայմաններում, երբ որոշ ժամանակ անց կաթողիկոսական պալատն անդամ մզկիթի էր վերածվել, երկրի նոր տերերը չէին կարող հանդուրժել մի ինչ-որ դավանափոխի վկայարանի գոյությունը, որին մոլեռանդ մոզերը շուրջ մեկ դար առաջ մահապատժի էին ենթարկել քրիստոնեությունը ընդունելու համար։ Ոչ մի կաս-

21 Ս տ ե փ ա ն ո ս Օ ր բ է լ յ ա ն, Պատմություն նահանգին Սիսական, Թիֆլիս, 1911, էջ 132։

22 Դ ր ա ս Խ ա ն ա կ ե ր տ ց ի, էջ 162։

23 Կ. Ղ ա ֆ ա դ ա ր յ ա ն, Նշվ. աղթ., էջ 120։

կած չի կարող լինել, որ Յիզտրուզիտի դամբարանը պետք է ավերվեր թերևս VII դ. կեսերին, ընդ որում կբանդվեր ոչ միայն վերերկրյա կառուցվածքը, այլև բուն դամբարանը:

Այսպիսով, դժվար չէ տեսնել, որ մատենագրական տեղեկությունների մինչև այժմ արված վերլուծությունները չեն տվել քիչ թե շատ որոշակի արդյունքներ կաթողիկոսական պալատի թվագրության և նրա կառուցման հետ կապված հանգամանքների որոշման բնագավառում: Մեր կարծիքով, հարցի պարզաբանմանը կարող է նպաստել Սեբեոսի մի հիշատակությունը. որը թեև անմիջականորեն վերաբերում է մեծ բաղիլիկային, սակայն խիստ էական նշանակություն է ստանում նաև պալատի հարցում:

Սեբեոսի այս խիստ հետաքրքիր (և մենք կասեինք՝ ճարտարապետության պատմության բնագավառում համարյա թե անուշադրության մասնըված) հիշատակության մեջ խոսվում է 572 թ. ապստամբության ժամանակ Դվինի Ս. Գրիգոր տաճարի այրման մասին: Թեև խոսքը վերաբերում է կաթողիկոսանիստ տաճարին, սակայն այն հանգամանքը, որ սերտ առնչություններ գոյություն ունեն կաթողիկեի և կաթողիկոսական պալատի միջև, և վերջինիս պատմական բախտը միշտ էլ անբալտելիորեն կապված էր տաճարի ճակատագրի հետ, որոշակի հիմքեր է տալիս ավելի հանգամանորեն կանգ առնել այս հարցի վրա:

Սեբեոսը գրում է. «Եկեղեցի սրբոյն Գրիգորի, որ շինեալ էր մերձ ի քաղաքն, էին արարեալ համբարանոցս պարսիկքն, հարին հուր և այրեցին»²⁴:

Նույն այս դեպքը նշված է նաև կաթողիկոսի տեղապահ Վրթանես Քերթողի և բյուզանդական Հայաստանի կառավարիչ Սորմենի նամակագրության մեջ, որտեղ վերջինս հիշատակում է Դվինում կրակով ոչնչացված և կործանված տաճարում նստած մի հոգևորականի մասին²⁵:

Տաճարի այրման փաստին անդրադարձել են նաև մի շարք հետազոտողներ²⁶,

Բնականաբար հարց է առաջանում՝ ի՞նչն էր ստիպել թշնամուն բռնադրավել եկեղեցին, փակել այդ նշանավոր պաշտամունքային կենտրոնը և վերածել այն համբարանոցի, ամենայն հավանականությամբ այնտեղ կուտակելով զորակայանի հեծելազորին անհրաժեշտ դարմանի և խոտի պաշարները: Այս բանը չէր կարող չզրգուել հայերին, և պարսիկները այդ չէին անի, եթե չստիպեր անհրաժեշտությունը: Նրանց այդ վարմունքը հասկանալու համար անհրաժեշտ է ի նկատի առնել ոչ միայն ընդհանուր պատմաքաղաքական իրադրությունը 572 թ. նախորդող շրջանում, այլև բուն տաճարի տեղաբաշխման հարցը, որը թերևս այստեղ վճռական նշանակություն է ունեցել:

Լավ հայտնի է, որ VI դարի կեսերից սկսած խիստ ուժեղանում է Սասանյան պետությունը, որն ամեն ինչ անում է վերջ տալու հայերի ինքնա-

²⁴ Սեբեոս, էջ 27:

²⁵ Տե՛ս «Գիրք թղթոց», Թիֆլիս, 1901, էջ 30, 43:

²⁶ Այսպես, Մ. Որմանյանը նշում է, որ «Դևոյ Ս. Գրիգոր եկեղեցին այրված էր 571-ին Վարդան Մամիկոնյանի շարժման առիթ» («Ազգապատում», Ա, էջ 631): Լեոն գրում է, որ Սմբատ Բագրատունին «... սկսեց նորից շինել Դվինի Ս. Գրիգոր եկեղեցին, որ կործանված էր Վարդան Մամիկոնյանի ապստամբության ժամանակ» (Լեոն. Նրկեր, հատ. Բ, Երևան, 1967, էջ 231):

վարական ձգտումներին, և Հայաստանը Պարսկաստանի մեջ միաձուլելու նըպատակով սկսում են Դվինում ատրուշան կառուցել: Ի պատասխան դրան ուժեղանում է ժողովրդի դժգոհության ալիքը և որոշակի բայելը են արվում Բյուզանդիայից օգնություն ստանալու ուղղությամբ: Մինչդեռ Դվինը Պարսկաստանի հզորագույն ամրոցներից էր, ուղղված ոչ միայն Բյուզանդիայի, այլև բուն հայ ժողովրդի դեմ, և պարսիկները ոչ մի գեպրում չէին կարող թույլ տալ նրա ամրությունների որևէ թուլացում:

Այս պայմաններում տարակույս չի կարող լինել, որ պարսիկ զորավարներին պետք է մեծապես մտահոգելին քաղաքի պարիսպներին խիստ մոտ գտնվող բաղիլիկան և առհասարակ այն բոլոր շենքերը, որոնք կառուցված էին այստեղ և համարյա թե հսկված էին պարսպին (միանավ եկեղեցին, Յիզուրուդիտի վկայարանը և, որ հնարավոր է, կաթողիկոսական պալատը): Այս տեսակետից առավել մեծ սպառնալիքը անշուշտ պետք է ներկայացնեք հսկա բաղիլիկան, որն իր ծավալով և բարձրությամբ համարյա թե ոչնչով չէր զիջում պարիսպներին: Գծվար չէ կոահել, որ բավական էր, որ բաղիլիկան ընկներ թշնամիների ձեռքը, և նրանք հիանալի հենակետ կստանային պարիսպների դրոհի համար, և տաճարի (թերևս նաև պալատի) տանիքների վրա կենտրոնացած նետաձիգները կարող էին խիստ մեծ վնաս պատճառել պարսպի պաշտպաններին:

Այժմ ինքնին հասկանալի է դառնում, թե ինչն էր ստիպել պարսիկներին նախօրոք բռնազրավել տաճարը (անշուշտ նաև շրջակայքի կառույցները), լցնել դարմանով ու խոտով և առաջին իսկ վտանդի պահին հրդեհել, միանգամից զրկելով հարձակվողներին նման հիանալի հենակետ ունենալու հնարավորությունից²⁷:

Վերը նշեցինք, որ մեզ հայտնի չէ հնագույն կաթողիկոսական պալատի իսկական տեղը: Ղազար Փարպեցու վկայությամբ համաձայն V դարի վերջում բաղիլիկայի շուրջը աղատ հրապարակներ էին տարածվում և այնտեղ չկար տաճարին մոտ կառուցված և ոչ մի շենք: Սակայն եթե մի պահ նույնիսկ ենթադրենք, որ մեզ հետաքրքրող պալատական կառույցվածքը (որը գտնվում է տաճարից 10—12 մետր հեռավորության վրա) նույն աչդ Գլուտ կաթողիկոսի պալատն էր, կամ մի այլ պալատ, կառուցված Վահան Մամիկոնյանի ժամանակներում, ապա նույնիսկ այդ գեպրում տարակույս չի մնում, որ այն ևս պետք է բաժանեք բաղիլիկայի տխուր ճակատագիրը, և թշնամին ոչ մի գեպրում չէր խնայի պարիսպներին: Այնքան մոտ տեղավորված այս կառույցվածքը ևս:

Այսպիսով, կասկած չի կարող լինել, որ 572 թ. բռնկած հրդեհի բոցերի մեջ պետք է կործանվեն և՛ բաղիլիկան, և՛ պալատը (եթե այն կար այստեղ), և՛ մյուս հարակից կառույցները:

Այսպես այլով և կործանված մնաց այս թողամասը շուրջ շորս տասնամյակ, և VII դարի սկզբին միայն Սմբատ Բաղրատունին ձեռնարկեց

²⁷ Ուշագրավ է, որ չորս տասնամյակ անց, 608 թ., երբ արժատապես փոխվել էր պատմական իրադրությունը և Պարսկաստանի հալածապարտության ներքո Սմբատ Բաղրատունին ձեռնարկեց տաճարի վերաշինման գործը, Դվինի պարսիկ բերդապահը նույն աչդ ռազմական տեսակետից նշելով, բողոքեց տաճարի վերականգնման դեմ, թե այն թկարի մերձ է առ բերդն և վնասակար է ի թշնամույն: Սակայն պարսից արքան հրամայեց ռեբրդն քակեսցի և եկեղեցին անդրեն ի նմին տեղադրե շինեսցիս (Ս ե ր ե ո ս, էջ 65):

կործանված շենքերի վերականգնման գործը: Չնայած նրան, որ Սերետար Հիշատակում է այդ թագամասի առավել նշանակալից հուշարձանը միայն, հաստատապես կարելի է ասել, որ Սմբատ Բագրատունին պետք է վերականգներ պաշտամունքային համալիրի բոլոր կառույցները, և կաթողիկոսանիստ նոր, զմբեկավոր տաճարի կողքին անշուշտ պետք է բարձրանար նաև նրան համապատասխանող կաթողիկոսական պալատը: Եվ անկախ նրանից, թե շենքն այդ կառույցվել էր հին պալատի հիմքերի վրա և կամ թե հողամասն ազատ էր ի սկզբանե (որն ավելի հավանական է թվում, երբ վերհիշում ենք Ղազար Փարպեցու վկայությունը), պեղումների շնորհիվ բացված մեզ հետաքրքրող պալատը իր հիմնական ճարտարապետական ձևերով պետք է լիներ VII դարի շինարարական գործունեության արդասիր, կառույցվեր հայկական ճարտարապետության մեջ ընդհանրացած նոր ոճական ուղղության պահանջներին համապատասխան:

Մատենադրական տեղեկությունների վերլուծության հիման վրա արված այս եզրակացությունը ունի սկզբունքային նշանակություն, որովհետև ինչպես կտեսնենք, այդ գրույթների հետ լիովին համահնչուն են հուշարձանի բոլոր ճարտարապետական ձևերը, այն բոլոր մանրամասները, որոնք պահպանվել են և լույս աշխարհ հանվել պեղումների շնորհիվ²⁸:

Դառնանք այժմ բուն կառուցվածքին, նրա կառուցապատմանն ու ճարտարապետական ձևերին:

* * *

Ամենից առաջ անդրադառնանք մեզ հետաքրքրող կառուցվածքի ճարտարապետական շրջապատին: Բանն այն է, որ կաթողիկոսական պալատը նրան շրջապատող կառույցների նկատմամբ ունի խիստ որոշակի շեղադիր դասավորություն, հանգամանք, որը ոչ միայն չէր կարող պատահական լինել, այլև ինչպես կտեսնենք հետագայում, խիստ որոշակի նշանակություն է ստանում ամբողջ համալիրի կառույցների շինարարության հերթականության որոշման հարցում:

Բացի բաղիլիկայից, որը VII դարի սկզբին հիմնովին վերակառուցվել էր, այստեղ առկա են ես երկու հուշարձան: Առաջինը վերը հիշատակված միանավ եկեղեցին է, իսկ երկրորդը՝ տաճարից արևմուտք տեղավորված ինչոր աշխարհիկ շենք:

²⁸ Այս խնդրի հետ սերտորեն առնչվում է Գլխում կաթողիկոսանիստ եկեղեցու տեղաբաշխման հարցը: Բանն այն է, որ տաճարի բռնազրավումից հետո (554—572 թթ. միջև) կաթողիկոսանիստ պիտի լիներ Գլխի մեկ այլ եկեղեցի, քնդ որում կասկած չի կարող լինել, որ բաղիլիկայի դրավման հետ միասին պարտիկները պետք է զբաղեին նաև կաթողիկոսական պալատը: Այս իրադրությունն ինքին որոշակի հիմքեր է տալիս Գլխի տեղիտորիայում պաշտամունքային մեկ այլ կենտրոնի գոյության հնարավորությունը՝ ենթադրելու համար, մի կենտրոն, որտեղ նստել էին հայ կաթողիկոսները շուրջ կես դար և այդտեղից վերադարձել իրենց ավանդական կենտրոնը, արդեն Կոմիտաս կաթողիկոսի ժամանակներում, երբ ավարտին էր հասել մեծ տաճարի կառուցման գործը: Պատմիչները խիստ զուտոյ են Գլխի պաշտամունքային կառույցների մասին խոսելիս, և հասկանալի է, որ նրանց կողմից հիշատակվող մի քանի վկայարանների անունները շատ հեռու են իրական պատկերը ներկայացնելուց: Երկրի մայրաքաղաքում անշուշտ գոյություն են ունեցել այլևայլ, զգալի չափեր ունեցող եկեղեցիներ, և այս առևտակետից բնորոշ է Անիի օրինակը, որտեղ Ս. Գրիգոր անվանակոչման մի քանի եկեղեցի կարևորացավ չէ, որ նման պատկեր գոյություն ուներ նաև Գլխում:

Որոշակի հիմքեր կան հնթադրելու, որ ըստ ժամանակագրության տաճարի կառուցումից հետո այստեղ բարձրացված առաջին շենքը եղել է հենց միանավ եկեղեցին, մի կառուցվածք, որի արևելյան ճակատը դրված է մեծ բազիլիկայի արևելյան բազմանիստ ասբիդի ուղղությամբ: Այն իր բոլոր ձևերով առնչվում է հայկական ճարտարապետության մեջ լավ հայտնի և V դարով թվագրվող հուշարձանների հետ: Բացառված չպետք է համարել, որ եկեղեցին կառուցվել է Վահան Մամիկոնյանի կողմից, նրա մարզպան նշանակվելուց հետո: Թերևս այս հուշարձանը ի նկատի ունի Սերեոսը, երբ դրում է, որ Վահան Մամիկոնյանը եկեղեցիներ է կառուցում Վաղարշապատում, Դվինում և այլուր:

Կաթողիկե եկեղեցու շրջապատից հայտնի երկրորդ կառուցվածքը գտնվում է նրա արևմտյան կողմում, տաճարից ընդամենը 12 մ հեռավորության վրա: Հազիվ թե կարելի լինի կասկածել, որ սա առնչվել է պաշտամունքային այս մեծ կոմպլեքսի հետ, կազմել նրա օրդանական մասը և այնտեղ չէր կարող ինչ-որ պատահական աշխարհիկ կառուցվածք տեղավորվել:

Կ. Ղաֆադարյանը գրում է, որ «կաթողիկոսի պալատի և մայր եկեղեցու արևմտյան կողմում... բացվեցին սրբատաշ տուֆ քարով շինված մոնումենտալ շինություններ, որտեղ գտնվեց նաև տուֆ քարից մի սքանչելի խարիսխ: Այդ խարիսխն իր շրջանաձև վերին մասից քառակուսու փոխարկվելու միջանկյալ տարածության անկյուններին ունի չորս ուռուցիկ եռանկյունաձև զարդեր: Այդ խարիսխը, ինչպես նաև ամբողջ շինությունը պատկանում է VII դարին: Այդ խարիսխի երկու օրինակներն էլ, մի քանի տասնամյակ առաջ, Վելին Արտաշատ գյուղի բնակիչները հայտնաբերել են նույն տեղում և տարել են իրենց գյուղը: Այստեղ հետաքրքիրն այն է, որ այդ սյունազարդ շենքը եկեղեցի չէ, այլ մի ինչ-որ աշխարհիկ շինություն, պալատ կամ պաշտոնատեղ և հավանաբար կործանվել է 893 թվականի մեծ երկրաշարժի ժամանակ»²⁹:

1964 թ. շարունակվեցին զգալի չափեր ունեցող այս աշխարհիկ շենքի պեղումները: Բացի այդ, նրանից հյուսիս հայտնաբերվեցին այլևայլ հիմնապատեր, առանձին կառույցների մնացորդներ: Ինչպես հիշատակում է Ա. Քալանթարյանը, այնտեղ բացվել է VIII դարի քառակուսի դահլիճ 7×7 մ չափերի, որտեղ հայտնաբերվեցին ծածկը կրող փայտյա սյուների խարիսխները³⁰:


Իսկ նաև այժմ համալիրի ընդհանուր կառուցապատման հարցերին: Վերը նշվեց արդեն, որ գլխավոր տաճարը և միանավ եկեղեցին ունեն խիստ որոշակի արևմուտք-արևելք առանցքային կողմնորոշում, իսկ կաթողիկոսական պալատը այս բոլոր շենքերի նկատմամբ ունի ակնհայտ շեղադիր դասավորություն³¹: Բնականաբար հարց է առաջանում. ի՞նչն էր խանգարել ճարտարապետին պալատը ևս տեղավորել միևնույն առանցքին համապատասխան և այսպիսով ստանալ տմբողջ կոմպլեքսի ավելի հավասարակշռված լուծում: Բուն պալատի հիշտ երկրաչափական կառուցումը իսպառ բացառում է

29 Կ. Ղաֆադարյան, նշվ. աշխ., էջ 58:

30 Ա. Կալանթարյան. Раскопки центрального квартала гор. Двина (1964—1965 гг.), «Պատմա-հնավաճարական հանդես», 1967, № 1, էջ 215:

31 Կ. Ղաֆադարյան, նշվ. աշխ., էջ 101, դժ. 73:

ներառնող հանուր դասավորության ինչ-որ «սխալի» ենթադրությունը: Ասել, որ պալատի տեղաբաշխումը պայմանավորված է եղել երկրի կողմերով, դարձյալ չի կարելի: Համանման շեղումներ սովորական են պաշտամունքային կառուցվածքներում և ամեն անգամ թելադրված են եղել նրանով, թե տարվա



Դիլին. տաճարի, պալատի և միանավ եկեղեցու հատակագծերը

որ ժամանակին է հիմնադրվել եկեղեցին և արևը ինչ դիրք է ունեցել երկրի կողմերի նկատմամբ: Սակայն այստեղ դործ ունենք աշխարհիկ կառուցվածքի հետ և հասկանալի է, որ այդ պարագան ևս չի կարող որոշիչ լինել:

Պալատի շեղադիր դասավորությունը չի կարելի բացատրել նաև տեղանքի պահանջներով, այն հասկանալի կլինի լեռնային վայրերում կառուցվող շենքերում, սակայն ոչ այստեղ, համեմատաբար հարթ այս վայրում:

Սակայն փաստը մնում է փաստ, որ ինչ-որ զործոն ստիպել է ճարտարապետին բնարևյու պալատի հատկապես այս դիրքը: Մեր կարծիքով այդպիսի զործոն է հանդիսացել արդեն գոյություն ունեցող շենքերի դասավորությունը: Ճարտարապետը, եթե չէր ցանկանում զգալիորեն փոքրացնել ապագա պալատի չափերը, ստիպված էր մի կերպ հարմարեցնել նրան հատկացված հողամասին, տեղավորել իր կառուցվածքն այնպես, որ գեթ որոշ ազատ տարածություն մնար պալատի և արդեն գոյություն ունեցող շենքերի միջև: Դժվար չէ տեսնել, որ պալատի տվյալ դասավորությունը միակ տրամաբանական տարրերակն է, և ճարտարապետը պարզապես ոչ մի այլ հնարավորություն չունի:

Այսպես, եթե պալատի հարավ-արևմտյան անկյունը գտնվում է տաճարի հյուսիս-արևմտյան անկյունից 12 մետր հեռավորության վրա, ապա նույն պալատի հարավ-արևելյան անկյունը գտնվում է տաճարի հյուսիսային ճակատից արդեն 15 մետր հեռավորության վրա³²: Բնականաբար հարց է առաջանում. ի՞նչն էր խանգարել պալատի հարավային պատը տեղադրել տաճարի հյուսիսային պատին դուրս, պահպանելով 12 մետր հեռավորությունը ամբողջ երկայնքով մեկ: Դժվար չէ տեսնել, որ այստեղ խանգարիչ հանգամանքը միակն էր՝ հին բաղիլիկայի հիմքերի վրա VII դարում կառուցված տաճարի կողային (հյուսիսային) արսիդի առկայությունը, որը զգալիորեն (մոտ 3 մետր) դուրս է գալիս տաճարի հյուսիսային ճակատի նկատմամբ: Ահա այս հանգամանքն է հենց, որ ստիպել է պալատի ճարտարապետին հնարավորին չափ շեղել պալատի հարավային պատը, որպեսզի քիչ թե շատ ազատ տարածություն մնա պալատի և տաճարի արսիդի միջև: Այստեղ տարածությունը կազմում է հազիվ 9,5 մետր, այն նվազագույնը, որը անհրաժեշտ էր մարդկանց նորմալ երթևեկության համար: Այս հանգամանքը, ինչպես դժվար չէ նկատել, խիստ որոշակի նշանակություն է ստանում երկու կառուցվածքների շինարարության ժամանակադրության, նրանց կառուցման հերթականության որոշման հարցում: Բանն այն է, որ եթե պալատի տեղաբաշխման ժամանակ ճարտարապետը ստիպված է եղել շեղել վերջինիս ուղղությունը, որպեսզի կառուցվածքի հարավային պատը բնահույ շմոտենա տաճարի հյուսիսային արսիդին, կարող է նշանակել միայն ու միայն մի բան՝ այն, որ պալատը կառուցելու պահին տաճարն արդեն կար է կամ թե նրանք կառուցվել են միաժամանակ, և պալատը կառուցողները հենց սկզբից ի նկատի են ունեցել տաճարի հյուսիսային արսիդի զգալի ելուստի առկայությունը:

Տաճարի արսիդները, ինչպես հայտնի է, արգասիք են հին բաղիլիկայի հիմքերի վրա միանգամայն նոր կոմպոզիցիա ունեցող զմբեթավոր տաճար տեղադրելու հանգամանքին, և արսիդները տվյալ դեպքում կոնստրուկտիվ մեծ անհրաժեշտություն էին, կոչված չեզոքացնելու հսկա զմբեթի հորիզոնական ճիգերը: Հասկանալի է, որ հին բաղիլիկան բնավ կարիք չունի նման արսիդների, և նրա պատերը դուրկ էին նման ելուստներից, և եթե մեզ հետաքրքրող պալատական շենքը հիմնադրված լիներ մինչև VII դարը, մինչև բաղիլիկայի կառուցումը, ապա ոչ մի անհրաժեշտություն չէր լինի պալատի նման շեղադիր դասավորության համար, և բաղիլիկայի ու պալատի պատերը

³² Կ. Ղ ա թ ա ռ յ ա ն, Նշվ. աշխ., գծ. N 73 (չափադրություն Գ. Քոչոյանի):


կարող էին ճիշտ և ճիշտ դուգահեռ դասավորություն ունենալ, այնպես, ինչպես տեսնում ենք միանավ եկեղեցու տեղաբաշխման հարցում: Այսպիսով պարզ է դառնում, որ պալատի նման դասավորությունը թեև զբաղված էր զմբեթավոր տաճարի կողային արսիղների առկայությամբ, և պալատի կառուցման ամենավաղ թվագրությունը, այսպիսով, պայմանավորված է հին բաղիլիկայի վերակառուցման տարեթվով, և մենք բոլոր հիմքերն ունենք ենթադրելու, որ նույն ճարտարապետը, որը վերակառուցում էր հին բաղիլիկան, տեղաբաշխել և կառուցել է տաճարից ոչ հեռու գտնվող պալատը: Այդ մասին է վկայում նաև պալատի հարավային ճակատում բացվող մուտքի և տաճարի հյուսիսային ճակատի արևմտյան հատվածում տեղավորված մուտքի ճիշտ և ճիշտ հանդիպակաց դասավորությունը, մի բան, որն անշուշտ չէր կարող պատահական լինել և կոչված էր ապահովելու պալատի և տաճարի անմիջական հաղորդակցությունը:

Այս ամենի հետ միասին հարց է առաջանում. ի՞նչն էր խանգարում ճարտարապետին ոչ թե շեղել պալատն ընդհանրապես, այլ շարժել այն մի քանի մետր դեպի հյուսիս, պահպանելով պալատի և տաճարի պատերի գուգահեռ տեղաբաշխումը: Սակայն չափազրական զծագրերից անմիջապես ակերհայտ է դառնում նման տեղաշարժման հնարավորության իսպառ բացառված լինելը: Եթե պալատն չէ տեսնել, որ այդ դեպքում համարյա թե կփակվեր այն ոչ չայն միջանցքանման տարածությունը, որը ստացվում էր պալատի և նրանից արևմուտք եղած ինչ-որ աշխարհիկ շենքի միջև, մի բան, որը բնավ չէր կարելի թույլատրել: Ընդհանրապես չէր կարող շարժել պալատը նաև արևելյան ուղղությամբ: Այստեղ էր միանավ եկեղեցին և նրա տեղաշարժման դեպքում նույնպես կփակվեր այն մի քանի մետր ազատ տարածությունը, որը ստացվում էր պալատի արևելյան ճակատի և միանավ եկեղեցու արևմտյան պատի միջև:

Այսպիսով, ակնհայտ է դառնում, որ VII դարի սկզբին, երբ վերակառուցվում էր բաղիլիկան և իր հին հիմքերի վրա բարձրանում զմբեթավոր, երկայնական ճակատներում դուրս եկող արսիղներ ունեցող տաճարը, նույն այդ ժամանակ էլ, բաղիլիկայից հյուսիս, մինչ այդ ազատ տարածության վրա (հիշենք Ղազար Փառպեցու «հրապարակացն շուրջանակի» արտահայտությունը) հիմնադրվում է մի նոր պալատ: Այն զալու էր փոխարինելու հնավանդ կաթողիկոսական պալատին, որը ինչ-ինչ պատճառներով նպատակահարմար չի եղել վերականգնելու:

33 Դարեր առաջ, ամենայն հավանականությամբ Եյուտ կաթողիկոսի ժամանակներում կառուցված այդ պալատի տեղն անգամ մնում է անհայտ: Երևելով վաղ միջնադարյան հայ ճարտարապետության մի շարք առանձնահատկություններից, կարելի է ենթադրել, որ պալատն ամենայն հավանականությամբ տեղավորված է եղել զբաղվող տաճարի հարավային կողմում: Բանն այն է, որ հնագույն պաշտամունքային կառուցվածքների գերակշռող մեծամասնության մեջ մուտքերը, որպես կանոն, տեղավորվում էին արևմտյան և հարավային կողմերում, և հյուսիսային ցուրտ բամիներից խուսափելու համար այս կողմերում սահմանափակվում էր լուսամուտների բաժանակը: Թեև կան առանձին շեղումներ (հատկապես ավելի ուշ շրջանում), սակայն երևույթն այս խիստ որոշակի է և ակնհայտ: Պատահական չէ բնավ, որ այնպիսի եռանավ բաղիլիկաներ, ինչպիսիք են Քասախը, Երերուրը, Աշտարակը, Աղցը հյուսիսային կողմում մուտքեր չեն ունեցել: Այս պայմաններում միանգամայն տրամաբանական է, որ պալատական կառուցվածքները պետք է տեղաբաշխվեն տաճարների հարավային և գուցե մասամբ էլ արևմտյան կողմերում և պալատի ու եկեղեցու միջև ընկած ազատ տարածության վրա էլ պիտի

Այսպիսով, որոշակի հիմքեր կան ենթադրելու, որ մեզ հետաքրքրող կառուցվածքի հիմնադրման ամենավաղ սահմանն է VII դարի առաջին տարիները, երբ Սմբատ Բագրատունին վերակառուցում էր այս ամբողջ պաշտամունքային համալիրը։ Մական ձիշտ այնպես, ինչպես 572 թ., այնպես էլ արաբների գրոհի ժամանակ (640 թ.) քաղաքի հիմնական պարիսպներին



Գլին. պալատ, սյան խոյակներից

մոտ գտնվող այս կառուցվածքները չէին կարող չդառնալ համառ մարտերի առարկա, որովհետև գրավելով տաճարն ու նրա մոտ եղած պալատը, հարձակվողները հուսալի հենարան էին ստանում քաղաքի հիմնական պարիսպների վրա գրոհելու համար։ Թշնամին շրջապատում է պարիսպները հսկա խարույկներով և ինչպես Սեբեոսն է ասում՝ «...արկին մուխ շուրջանակի, մերժեցին ծխովն և նևտաձողութեամբն ղբահապանս պարսպին»³⁴։ Այս պայմաններում ինքնին հասկանալի է, որ այրվող քաղաքի մեջ չէր կարող անվնաս մնալ վիսյառածածկ, պարիսպներին այնքան մոտ գտնվող պալատը։ Իսկ վնասվածքները, կարելի է ենթադրել, խիստ էական էին։ Եթե պատերը համեմատաբար րիչ էին տուժել, ապա հաղարաչեն ծածկի այրվող գերանների տակ թաղված քարե սյուներից, նրանց բներից, խարիսխներից և խոյակներից հազիվ թե որևէ բան մնացած լիներ։ Կասկած չի մնում, որ վերակառուցող ճարտարապետները ստիպված էին վերափոխելու ամբողջ կրող սիստեմը, վերակառուցելու թե՛ սյուները և թե՛ ծածկն ամբողջությամբ։

Հավարվեր ժողովուրդը մինչև ժամասացությունը սկսվելը։ Զվարթնոցի և Արուճի պալատների տեղաբաշխման փաստը լիովին հաստատում է այս։
34 Ս Ե Բ Ե Ս, էջ 110։

Թ. Թորամանյանը, հենվելով Սերետսի վրա, գրում է հետևյալը. «Տարակույս չկա, որ արաբական արշավանքի պատճառով Դվինը չափազանց ավերվելուց հետո նույնիսկ ավերված էր կաթողիկոսական բնակարանը: Կաթողիկոսի անձնական բնակարան չունենալու և Դվինի միանգամայն ավերված և քանդված լինելը թերևս Ներսեսին առիթ եղավ իր շինարարությունը՝ Վաղարշապատի մեջ սկսել, կաթողիկոսարանը ևս այնտեղ տեղափոխելու»³⁵: Սակայն Զվարթնոցի հսկայածավալ շինարարությունը չէր կարող արագ ավարտվել, իսկ Դվինը մնում էր կաթողիկոսի պաշտոնական նստավայր: Հազիվ թե կարելի լիներ կասկածել, որ այդ էին պահանջում նաև Դվինում նստած արաբները: Այս պայմաններում տրամաբանական է, որ Զվարթնոցի շինարարությունը դուրսհանալ Ներսեսը պետք է ձեռնարկեր նաև Դվինի պալատի վերակառուցումը: Բացառված չէ, որ Ներսեսը շտապում էր ավարտել Դվինի պալատի վերակառուցումը այն հաշվով, որպեսզի նա պատրաստ լիներ 648 թ. հրավիրվելիք ժողովի համար: Այս հինգ տարիները լիովին բավարար էին հրգեհից վնասված փայտածածկ պալատի վերականգնման համար, մինչդեռ Զվարթնոցի շինարարությունը հեռու էր ավարտից: Մի քանի տարի անց, 652 թ. Դվինի այս պալատում է իջևանում Բյուզանդիայի Կոստանդ կայսրը:

Շատ ժամանակ չէր անցել այն պահից, երբ ավարտվեցին Սմրատ Բագրատունու նախատեսած կառույցները: Հայտնի է, որ տաճարի շինարարությունը ավարտվեց Կոմիտաս կաթողիկոսի ժամանակ: Անցել էր, այսպիսով, ընդամենը շուրջ երկու տասնամյակ և բացառված չպետք է համարել Դվինում աշխատած վարպետների մասնակցությունը Զվարթնոցի շինարարությունը: Որ այդ այդպես էլ եղել է, ակնհայտորեն վկայում է ճարտարապետական ձևերի այն բացառիկ մոտիկությունը, որը տեսնում ենք Դվինի կաթողիկոսական պալատի և VII դարի 40—60-ական թթ. կառուցված այնպիսի հուշարձանների ձևերի միջև, ինչպիսիք են Զվարթնոցը ու Արուճը:

Դառնանք բուն ճարտարապետական ձևերին և առաջին հերթին կոնստրուկտիվ տեսակետից այնպիսի կարևոր տարրերին, ինչպիսիք են սյուները, դրանց առանձին ձևերը: Ինչպես ցույց են տալիս ուսումնասիրությունները, այն ժամանակ, երբ Երեւոյի արտաքին սյունասրահի սյուները, անտիկ ավանդույթներին հետևելով, ունեին նեղացում դեպի վեր (էնտուզիս), նման բան չի նկատվում ո՛չ Դվինի, ո՛չ Զվարթնոցի, ո՛չ էլ Արուճի սյուներում:

Ոչ պակաս հետաքրքիր են պալատի սյուների այնպիսի տարրերը, ինչպիսիք են խարիսխները:

Վերջիններս բաղկացած են երեք հիմնական մասերից՝ ներքնասալից, գլանաձև մասից և վզիկից: Դժվար չէ նկատել, թե որքան հեռու են խարիսխների այս ձևերը V դարով թվագրվող հուշարձանների համապատասխան ձևերից (Փասախ, Երեւոյ, Եղվարդ և այլն):

V դարի խարիսխներին բնորոշ է ուժեղ տրամատավորված լինելը, երբ առկա են միմյանց զուգահեռ, համեմատաբար մանր, որոշ առումով անտիկ ձևերը հիշեցնող տրամատներ: Այդ տեսնում ենք և բազիլիկաների³⁶ մույլե-

35 Թ. Թորամանյան, Նյութեր հայ ճարտարապետության պատմության, հատ. առաջին, Երևան, 1942, էջ 261:

36 Ա. Սահիբյան, Փասախի բազիլիկայի ճարտարապետությունը, Երևան, 1955, էջ 31:

րի խարիսխների, և՛ այնքան սակավաթիվ առանձին կանգնած սյուների խարիսխների ձևերում: Այս տեսակետից առանձնակի բնորոշ են Երեբուքի արտաքին սյունասրահի առանձին կանգնած սյուների խարիսխները³⁷, Զրվե-
ժի V դարի հուշասյան խարիսխը³⁸ և այլն: Նման խարիսխներ քիչ չեն հայտ-
նաբերվել Դվինի պեղումների ժամանակ³⁹ և սկզբունքորեն նույն մշակումն
ունեն նաև Դվինի մեծ բազիլիկայի որմնասյուների խարիսխները⁴⁰:

Երբ համեմատում ենք վերը նշվածների հետ Դվինի կաթողիկոսական
պալատի խարիսխները, ապա դժվար չէ տեսնել, թե ինչքան մեծ, ինչքան
սկզբունքային են տարբերությունները: Եվ ընդհակառակը, երբ համադրում
ենք նույն Դվինի կաթողիկոսարանի խարիսխները արդեն VII դարով թվա-
գրվող հուշարձանների խարիսխների հետ, ապա չի կարելի շնկատել նրանց
խիստ մոտիկությունը, իսկ առանձին դեպքերում էլ համարյա թե նույնու-
թյունը: Հանգամանքն այս վաղուց է նկատված, և միանգամայն իրավացի է
Վ. Հարությունյանը, երբ որոշակի նմանություն է տեսնում Դվինի և Զվարթ-
նոցի էքսեդրանների սյուների խարիսխների միջև⁴¹:

Սակայն էլ ավելի մոտ են Դվինի խարիսխները Զվարթնոցի տաճարի
առանձին կանգնած սյուների խարիսխներին, ընդ որում նրանք մոտենում են
նաև բացարձակ չափերի տեսակետից⁴²: Ըստ էության համանման մշակում
են ունեցել նաև Արուճի պալատի խարիսխները⁴³:

Այս ամենն անշուշտ պատահական չէ: Հանդիսանալով խիստ որոշակի
կոնստրուկտիվ մի ձև, խարիսխները, ինչպես և խոյակները, պատկանում են
առավել «զգայուն» ճարտարապետական ձևերին, որոնք որոշակի փոփոխու-
թյուններ են կրում ոճական ամեն մի տեղաշարժի ժամանակ: Նման մի ոճա-
կան տեղաշարժ, նոր փուլ էր VII դարը հայ ճարտարապետության V դարի
նկատմամբ և հենց դրանով էլ պետք է բացատրել ճարտարապետական բազ-
մաթիվ նոր լուծումների, նոր ձևերի և մոտիվների առկայությունը: Ահա այս
նոր ոճական ուղղության կնիքն էլ իրենց վրա են կրում Դվինի խարիսխները:

Առանձնակի հետաքրքրություն են ներկայացնում Դվինի պալատի սյու-
ների խոյակները: Նրանք, ըստ իրենց կոնստրուկտիվ էության, կրկնում են
ժողովրդական բնակելի տների ծածկերում ընդհանրացած ենթահեծանային
խոյակների ձևերը⁴⁴, սակայն արդեն հարմարեցված քարի պայմաններին:
Փայտե խոյակներում լավ հայտնի են սյան բնից մինչև վերնասալը արվող բո-
լորածև փոխանցումների ձևերը, որոնք սովորաբար ձևավորվում էին մանր
զարդաձևերով մշակված մոտիվներով: Այս մոտեցումը հատկապես ցայտուն
է դրսևորվում Սևանի խոյակներում: Քարի պայմաններում նման աստիճանա-

37 Ս. Մնացականյան, Զվարթնոցը և նույնատիպ հուշարձանները, Երևան, 1971, էջ 245:

38 Н. М. Токаревский, Джрвеж—Вохжаберд, Ереван, 1964, էջ 42:

39 Վ. Հարությունյան, նշվ. աշխ., էջ 94:

40 Կ. Ղաֆադարյան, նշվ. աշխ., էջ 95:

41 Վ. Հարությունյան, նշվ. աշխ., էջ 62:

42 Ս. Մնացականյան, նշվ. աշխ., էջ 37:

43 Վ. Հարությունյան, VII դարի աշխարհիկ ճարտարապետության մի նոր հուշարձան, ՀՍՍՀ ԳԱ «Տեղեկագիր» (հաս. գիտ.), 1953, № 8, էջ 62:

44 Ս. Վարդանյան, Հայկական ժողովրդական բնակելի տների ճարտարապետու-
թյունը, Երևան, 1959, էջ 67: Ն. Պասյոխյան, Սյունիքի ժողովրդական ճարտարապե-
տությունը, Երևան, 1972, էջ 126:

կան նեղացումը բացառված էր, որովհետև քարե խոյակն իր ամբողջ երկայնքով պետք է ունենար բավականին զղալի բարձրություն, մի բան, որը և դրսևորվեց փոխանցման միայն մեկ տարրի, մեկ վարդյակի կամ վարդյակ-




Արուձ. պալատի խոյակներից

ուրազարդի առկայությամբ: Պատահական չէ, որ համանման լուծումներ ունեն և՛ Դվինի, և՛ Արուձի խոյակները:

Հայկական ճարտարապետության մեջ V դարում ուրազարդ խոյակներ հայտնի են եզակի հուշարձաններում միայն: Վաղ հուշարձաններում ուրազարդերի չափերը մեծ չեն և նրանք բնավ չեն կանխորոշում խոյակի տիպը: Ահա այսպես են մշակված Երեբունքի որմնասյուների խոյակները և նույն Երեբունքում սլահպանված հուշասյան մի խոյակ:

Միանգամայն այլ պատկեր ենք տեսնում VI—VII դդ.: Այժմ ուրազարդերը զգալի չափեր են ստանում (Ավան, Պտղնի) և խիստ զգալի տեղ գրավում խոյակի ամբողջ կոմպոզիցիայում: Պահպանելով ուրազարդ խոյակների հիմնական հատկանշական գծերը (հատկապես կողային բարձիկները), որոշ խոյակներում վարպետները անջատում են ուրազարդերը, վերածում նրանց շրջանակների մեջ պարփակված վարդաձևերի (Դվին, հուշասյան խոյակ): Առանձին կանգնած սյուներում կոնստրուկտիվ նկատառումներից ելնելով ավելացվում է ուժեղ զամբյուղը: Թերևս դրա առաջին օրինակներից են Զվարթնոցի էքսեդրայի խոյակները: Նույն այս մոտիվը զգալի տարածում է գտնում հետագայում հուշասյուների խոյակներում, և որպես ցածրանիստ բարձիկ հանդես գալիս Դվինի հուշասյան խոյակի վրա, կրկնվում Արզնիի հուշասյան խոյակում և այլն: Այս տեսակետից խիստ ուշադրավ է Դվինի հուշասյան խոյակը, որի շրջանազարդ որուղազարդերի միջանկյալ տարածությունը մշակված է Դվինի խոյակի նման, ձկուն, դեպի վեր բարձրացող և կող թեքվող արմավի

ձյուղերով⁴⁵, եվ եթե այս երկու խոյակներին ավելացնենք Արուճի պալատի խոյակները, որտեղ առկա են և՛ ոլորաղարդեր արմավի ձյուղերով, և՛ շրջանաղարդեր, սակայն կողային մասերում ոլորաղարդերին բնորոշ բարձիկ-



Արուճ. պալատի խոյակներից

ներով, ապա ականհայտ կդառնա, որ Դվինի խոյակը ոչ այլ ինչ է, քան VII դարում հայկական ոլորաղարդ խոյակների մշակման մի ուշագրավ աստիճան, ընդ որում այստեղ խիստ ականհայտ է բարի մեջ մշակված ձևերի ազդեցությունը փայտե կոնստրուկցիաներին բնորոշ ենթահեծանային խոյակների ձևերի վրա, մի բան, որը ամենից առաջ դրսևորվել է խոյակների անմիջական շարունակությունը հանդիսացող բարձիկների առկայությամբ: Իսկ ինչ վերաբերում է Դվինի խոյակի առանձին զարդաձևերին, ապա նրանք ևս դուրս չեն գալիս մեզ հետաքրքրող հուշարձանների շրջանակներից: Ճիշտ է, արմավի տերևը ավելի լայն տարածում ունեն համեմատաբար վաղ շրջանում, սակայն նա ոչ պակաս հաջողությամբ կրկնվում է առանձին դեպքերում նաև VII դարում (Արուճի խոյակները, Դվինի հուշասյան խոյակը, կոթողներ), չի մոռացվում նաև ավելի ուշ շրջաններում (Սևանի խոյակները, Անիի, Հոռոմոսի, Բղենո նորավանքի հուշարձանները և այլն): Առանձնակի կարևորություն է ստանում Դվինի և Արուճի խոյակների համադրությունը: Չափերի համարյա թե նույնությունը, մշակման նույնատիպ սիստեմը (տարբեր են միայն վերնասալի և խոյողների միջև եղած տարածության մշակումները) ականհայտորեն հաստատում են երկու խոյակների միևնույն ոճական հոսանքին պատկանելու հանգամանքը: Ուշագրավ են նաև Դվինի խոյակի վերնասալի ձևերի զուգահեռները: V դարում բնավ անհայտ այս մո-

45 Կ. Ղ ա ֆ ա դ ա ր յ ա ն, նշվ. աշխ., էջ 146:

տիվը հիանալի կերպով դրսևորված է VII դարի մի շարք հուշարձաններում (Զրվեժ, Թարգմանշաց, Սիսավան):

Այս ամենն անշուշտ պատահական չէր կարող լինել: Ենթադրել, որ VII դարում կառուցված Զվարթնոցի և Արուճի ճարտարապետները ինչ-ինչ հնագիտական պրպտումներ են կատարել և ընդօրինակել իրենցից շուրջ երկու դար առաջ կառուցված հուշարձանի ձևերը⁴⁶ և նույնիսկ զարդամոտիվները, կլինե՞ր խիստ անտրամաբանական: Հայկական ճարտարապետության ամեն մի նոր ոճական ուղղություն (իսկ այդպիսին էր անշուշտ VII դարը V դարի նկատմամբ) թեև խարսխվում էր նախորդ դարերին բնորոշ հորինվածքների վրա, սակայն շատ շուտով մշակում էր իրեն յուրահատուկ ձևերը, ընդ որում հատկապես դեկորատիվ մոտիվների և զարդաքանդակների բնագավառում նույնությամբ չկրկնելով հնավանդ և ոչ մի ձև:

Ամբողջ հայկական ճարտարապետության պատմության մեջ եզակի օրինակներ կարելի է նշել միայն, երբ հաջորդ դարաշրջանի ճարտարապետները նույնությամբ պահպանելով կառուցվածքների չափերն անդամ, կրկնել են նախորդ շրջաններում մշակված հորինվածքները: Նման բան հայտնի չէ VII դարում առհասարակ: Կարելի է նշել X—XI դարերից մի քանի օրինակներ միայն (Գագկաշեն), ընդ որում այնտեղ ևս Տրդատ ճարտարապետը մի շարք էական փոփոխություններ մտցրեց համաչափությունների մեջ և չկրկնեց Զվարթնոցի և ոչ մի զարդամոտիվ:

Այսպիսով, Դվինի և Արուճի պալատների թե՛ հորինվածքների, թե՛ չափերի, թե՛ զարդաձևերի միջև եղած զարմանալի նմանությունը, Դվինի պալատի սյուների խարիսխների և Զվարթնոցի տաճարի խարիսխների համանման մշակում ունենալը, Դվինի տաճարից արևմուտք ընկած վայրում հայտնաբերված խարիսխների և Զվարթնոցի մեծ դահլիճին պատկանող խարիսխների մոտիկությունը տարակույս չեն թողնում, որ նշված բոլոր կառուցվածքներն էլ պատկանել են ոճական միևնույն ուղղությանը և նրանց թվագրությունների միջև տարբերությունը չի անցել մի քանի տասնամյակից, ընդ որում Դվինում և Զվարթնոցում անկասկած աշխատել են միևնույն վարպետները: Ավելին, բացառված չպետք է համարել, որ առանձին վարպետներ, որոնք երիտասարդ հասակում աշխատել են Դվինում և Զվարթնոցում, Զվարթնոցի ավարտից (562 թ.) ընդամենը մեկ տասնամյակ հետո, նույն VII դարի 60—70-ական թթ. սահմանագծին կարող էին մասնակցել նաև Արուճի տաճարի և պալատի շինարարությանը:

Ամփոփենք. մատենագրական աղբյուրների և մեզ հետաքրքրող կառուցվածքների ճարտարապետական ձևերի համեմատական վերլուծության հիման վրա կարելի է հանգել հետևյալ եզրակացությունների.

Հայոց մայրաքաղաքի կենտրոնական թաղամասում այնքան նշանակալից տեղ զրավող պաշտամունքային կենտրոնի կազմավորումը տևել է շուրջ երեք դար, ընդ որում անսամբլի ճարտարապետական դոմինանտը՝ մեծ բազիլիկան և ապա նույն տեղում, նույն հիմնապատերի վրա կառուցված զմբեթավոր տաճարը, միշտ էլ պահպանել են իրենց որոշիչ նշանակությունը:

Կաթողիկոսանիստ այդ տաճարից ոչ հեռու պետք է լինե՞ր նաև կաթողիկոսի ու պալատը, կառուցված ամենայն հավանականությամբ V դարում, Գյուտ

⁴⁶ Н. М. Токаревич, Архитектура Армении IV—XIV вв., էջ 66:

կաթողիկոսի Դվին տեղափոխվելու առնչությամբ: Դժբախտաբար մինչև այժմ այն չի հայտնաբերվել: Սակայն կասկած չի կարող լինել, որ VI դարում ծավալված ռազմական գործողությունների պահին, երբ այրվում էր մեծ տաճարը, անվնաս չէր կարող մնալ նաև կաթողիկոսական պալատը: Տաճարը մնաց լքված և կիսակործան մինչև VII դարի սկիզբը, երբ Սմբատ Բագրատունին հին քաղիքիկայի հիմքերը օգտագործելով, կառուցեց մի նոր դմբեթավոր տաճար, իսկ նորընտիր կաթողիկոսի համար՝ մի նոր պալատ, տեղափոխելով այն տաճարից հյուսիս տարածվող ազատ տարածության վրա:

640 թ. արարների գրոհի ժամանակ Դվինի րազմաթիվ այլ շենքերի հետ միասին այրվեց նաև այս նորակառույց պալատը: Շատ չանցած, 643—648 թթ. ընթացքում, այն վերականգնեց Ներսես Դ կաթողիկոսը, ընդ որում աշխատանքները բնիկացան Զվարթնոցի շինարարությանը գույահենու 893 թ. մեծ երկրաշարժի ժամանակ կործանվեց մեծ տաճարը: Կաթողիկոսի պալատը մընաց անվնաս, և հետագայում խալիֆաթը այն վերածեց մզկիթի: Կառուցվածքը կանգուն մնաց ևս երկու դար և ամենայն հավանականությամբ կործանվեց XIII դարում, մոնղոլական արշավանքների ժամանակ:

О ВРЕМЕНИ ПОСТРОЙКИ ДВОРЦА В ДВИНЕ

С. Х. МНАЦАКАНЯН

(Резюме)

В истории армянского зодчества дворец в Двине занимает особое место. Вопрос датировки неоднократно дискутировался: К. Г. Кафадарян датирует сооружение концом V в., В. М. Арутюнян считает возможным отодвинуть дату на VI в., а Н. М. Токарский датирует дворец началом VII в. В последнее время в специальной литературе памятник безоговорочно включается в ряд древнейших сооружений раннесредневековой Армении, твердо датируемый V в.

На основе анализа средневековых авторов и архитектурных форм сооружения в статье отмечается, что правы те исследователи, которые датируют сооружение VII в. Однако сведения средневековых авторов не дают достаточных оснований для ранней датировки сооружения. С другой стороны, анализ архитектурных форм дворца не оставляет сомнения, что они самым тесным образом связаны с формами, получившими развитие уже в середине VII в. Это приводит к выводу, что если дворец и основан князем Смбатом Багратуни в начале VII в., то он подвергся основательной перестройке в 40-х годах VII в. католикосом Нерсесом III.

Это подтверждает полная аналогия архитектурных форм дворца с соответствующими элементами как храма Звартноц, так и дворцовых сооружений — Звартноца, и Аруча — памятников 40-х — 60-х годов VII в.

Все это не оставляет сомнений, что в том виде, в котором памятник дошел до нас, он является сооружением не V, а VII века.